

**Naaja H. Nathanielsen  
Attaviitsoq**

**UPA16/25  
11. april 2016**

**Uunga siunnersuut: Akileraaruserinermik ingerlatsineq pillugu Inatsisartut inatsisaata allanngortinneqarnera pillugu Inatsisartut inatsisaat nr. xx, xx. xxx 2016-imeersoq. (Soraarnerussutisiaqarnissamut aaqqissuussinernik nunanut allanut nuussineq).**

(Aningaasaqarnermut Aatsitassanullu Naalakkersuisoq)

Soraarnerussutisiaqarnermik sillimmasiinermillu suliffeqarfik nunatsinni immikkoortortaminik unitsitsinissaminik eqqarsaatersuuteqarpoq. Tamanna pippat sullitami ileqqaagaat Danmarkimi suliffeqarfimmut nuunnissaannik suliffeqarfiup sullitani neqeroorfiginiarpai. Nunamiit aningaasarparujussuit ataatsikkut nuunneqarpata, maanna akileraartarnermut inatsisit atuuttut naapertorlugit, kommuninut landskassemullu ataasiartumik akileraartarnikkut isertitserujussuortoqassaaq.

Naalakkersuisulli inatsisit allanngortinniarpaat, taamaalilluni immikkut ittumik isertitsinissaq landskassemut taamaallaat iluaqusiisussanngortissallugu. Naalakkersuisut aningaasaateqarfimmik aningaasanik taakkuninnga ilioraaffiusussamik pilersitsiniarput. Aningaasaateqarfik, Piffissaq ungasinnerusoq eqqarsaatigalugu aningaasaliissuteqarnissamut Aningaasaateqarfik, sulii pilersinneqarsimangilaq. Aatsaalli pilersinneqassalluni Inatsisartut akuerippassuk Kommunit Namminersorlutillu Oqartussat missingersuutaat naatsorsuutaallu pillugit Naalakkersuisunit siunnersuutaasoq akuerineqarpat.

Siunnersuutigineqartoq Inatsisartut Aningaasaqarnermut Akileraartarnermullu ataatsimiititaliaanut innersuuppara. Isummerfigisassat pingasut ataatsimiititaliap isummerfigisariaqarpai:

Siullertut qulakkeerneqanngilaq Piffissaq ungasinnerusoq eqqarsaatigalugu aningaasaliissuteqarnissamut Aningaasaateqarfik ilumut pilersinneqassanersoq. Tamanna aatsaat ilisimalissavarput majip naanerani aningaasaateqarfik pillugu naggataarutaasumik suliarineqareerpat. Taamaattumik ajornartorsiutaasoraara una siunnersuut oqaluuserisarput maji aallartisimalerneraniit inaarneqareertussaammat. Ajornerpaaffianiissappat Inatsisartut inatsimmik pilersitsissapput, aningaasaateqarfimmut pilersinneqanngitsumut innersuussinertalimmik. Taamaattumik siunnersuutigissavara siunnersuutip matuma pingajussaaneerneqarnissaa immikkoortup 20 suliarereernerani aatsaat pissasoq.

Aappaatut ataatsimiititaliap isummerfigisassaasa ilagivaat, KANUKOKAp Qaasuitsup Kommuniatalu Piffissaq ungasinnerusoq eqqarsaatigalugu aningaasaliissuteqarnissamut Aningaasaateqarfiup pilersinneqarnissaanut patsisaasunut paatsuungarpassimatigit. Aningaasaateqarfik pilersinneqarpat aningaasaateqarfiup pigisaasa agguarnissaanut toqqaannartumik sunniuteqarsinnaaneq kommuninut annaaneqartussaassaaq. Siunissaq eqqarsaatigalugu tamanna aporaaffiusinnaasoq kommuninut erseqqissaassutigineqarnissaa pingaaruteqarpoq.

Pingajussaattut tunngaviummik oqallisigissallugu pisariaqarsorinarpoq, naalakkersuinikkut sulialinninngaanniit soraarnerussutisiaqarnermik aningaasaateqarfiit Nunatsinni angerlarsimaffeqarnissaat pillugu aalajangiisoqassanersoq. Illersugassaqarlunilu akerliligassaqaqaarmi. Maannangaq apeqqummut tassunga isummertoqarsimangilaq.

**Naaja H. Nathanielsen**  
**Attaviitsoq**

Siunnersuutigisannut innersuussiniarpunga, tassanimi suleqatigiisitamik ukiuni tulliuuttuni soraarnerussutisiaqarnermut inatsisissamik siunnersuuteqartussamik pilersitsinissaq siunnersuutigaara. Suleqatigiissitaq aamma immikkoortoq 21-mut isummersinnaassaaq.

Ataatsimiititaliaq sulilluarnissaanik kissaappara.